

**Namminersornerullutik Oqartussat kommunillu inissiaataannik
attartortittakkanik inissiatut imaluunniit illutut nammineq pigisatut
tiguisarneq pillugu Inatsisartut peqqussutissaattut siunnersuut**

pillugu

Inatsisartut Attaveqaqatigiinnermut Ineqarnermullu Ataatsimiititaliaata

ISUMALIUTISSIISUTAA

siunnersuutip aappassaaneerneqarnerani saqqummiunneqartoq

Inatsisartut Attaveqaqatigiinnermut Ineqarnermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Godmand Rasmussen, Atassut, siulittaasoq
Inatsisartunut ilaasortaq, Vittus Mikaelson, Siumut
Inatsisartunut ilaasortaq Esmar Bergstrøm, Inuit Ataqtigiit
Inatsisartunut ilaasortaq Marie Fleischer, Demokraatit
Inatsisartunut ilaasortaq Jürgen Weyer Johansen, Siumut
Inatsisartunut ilaasortaq Simon Olsen, Siumut
Inatsisartunut sinnisussaq Ole Thorleifsen, Siumut
Inatsisartunut sinnisussaq Emilie Olsen, Atassut

Siullermeerinerup kingorna Inatsisartut Attaveqaqatigiinnermut Ineqarnermullu
Ataatsimiititaliaata siunnersuut nassuiaatitaalu misissorpai.

1. Siunnersuutip imarisai ataatsimiititaliallu taakkununga oqaaseqaatai.

Peqqussut atuuttoq naapertorlugu inissiami attartortut minnerpaamik 75 %-iisa
inissiaminnik tigusinissaq kissaatigippassuk inissiami attartortittakkami inissiamik
Namminersornerullutik Oqartussat aatsaat tunisisinnaapput. Peqqussulli atuuttoq
naapertorlugu kommunit inissiat ataasiakkaarlugit tuninissaannut periarfissaqarput.
Siunnersuut aqutigalugu Namminersornerullutik Oqartussat kommuninut
naligiisinneqassapput.

Taamaalilluni inissiami attartortittakkami najugallit allat pisinissamik kissaateqarnersut apeqquaatinnagu Namminersornerullutik Oqartussat inissiaataanni attartortittakkani attartortut iniminnik attartukkaminnik pisarinninnissamut periarfissaqalernerat siunnersuutip kingunerissavaa.

Kiisalu siunnersuutip kingunerisaanik teknikikkut aningaasaqarnikkullu naliliineq tunngavigalugu akigititaq aallaavigiunnaarlugu niuernermi akigititat aallaavigalugit inissiat attartukkat tunineqarsinnaalissapput.

Niuermili akiusoq ilanngaaserneqartassaaq, attartortup qanoq sivistigisumik attartortuusimanera, tassa attartortitsisup inissiaataani ataannartumik qanoq sivistigisumik najugaqarsimanera, apeqquaatillugu annertussusilerneqartussamik. Taamaalillunilu attartortoq Namminersornerullutik Oqartussat inissiaataannit allamit Namminersornerullutik Oqartussat inissiaataannut allamut nuukkuni attartortutut piffissaq katersiviusoq annaassanngilaa. Aamma taamaappoq attartortoq kommunip ataatsip iluani kommunip inissiaataanit allamit kommunip inissiaataanut allamut nuuppat. Attartortorli kommunimini attartukkaminut inissiamut kommunip allap pigisaanut nuuppat – attartortup piffissaq katersiviusoq annaassavaa. Aamma taamaappoq kommunip inissiaataanit Namminersornerullutik Oqartussat inissiaataannut imaluunniit Namminersornerullutik Oqartussat inissiaataannit kommunip inissiaataanut attartortoq nuuppat.

Inissiat attartortittakkat minnerpaamik pingasunik attartortittakkanik inissiarqarunik aatsaat ilanngaaserneqarsinnaapput.

Iluanaarniapilussinnaaneq annikillisinniarlugu niuernermi akigititamut ilanngaatigineqartup annertoqataanik tunisisup (Namminersornerullutik Oqartussat kommunilluunniit pineqartup) illu akit nikingassutaannut qularnaveeqqussissavaa. Akit nikingassutaannut qularnaveeqqusiissut ukiuni qulini nalikilliartuaartinneqassaaq. Tamatuma kingunerisaanik pisisoq minnerpaamik ukiut qulit qaangiunnerisigut inissiamik aatsaat tunisiguni ilanngaatigineqartoq tamakkiisoq pissarsiarisinnaavaa.

Attartortoq, pisortat illuutaanik attartukkaminik pisinissamik isumaliutiginnikkuni, tamanna pillugu qinnuteqaammik attartortitsisumut nassiussisinnaavoq. Tullertullu attartortitsisoq allakkatigut neqeroormik, paasissutissanik aalajangersimasunik arlalinnik ilaatigut niuernermi akigititamut paasissutissanik ilanngussartalerlugu, attartortumut nassiussissaaq. Tassunga atatillugu Inatsisartut peqqussutissaat nutaaq naapertorlugu paasissutissat attartortup pissarsiarissallugit piumasarisinnaasai inatsisartut peqqussutaannut atuuttumut sanilliullutik ikinnerummata eqqumaffigineqartariaqarpoq.

Assersuutigalugu illuutip/inissiap aserfallatsaalineqarnerata qanoq issusia pillugu paasissutissinneqarnissamik, illup sananeqaataasa ukiut 15-it 30-illu akornanni sulii atasinnaanerannut takussutissiamik kiisalu tamatumani aningaasaliissutissatut pisariaqartinneqartussatut naatsorsuutigineqartunut missingiummik attartortoq piumasaqaateqarsinnaanngilaq (naak Inatsisartut peqqussutaanni attuuttumi § 7, imm. 1, nr. 1 aamma 4 malillugu taamaakkaluartoq). Illuutip

aserfallatsaaliineqarnerata qanoq issusia niuernermi naligitinneqartukut soorunami ersersinneqassaaq, taamaalillunilu attartortoq pisinissamik neqeroorummik akuersissaguni peqqusersusaarfigineqarsinnaassanani. Taamaakkaluartoq assersuutigalugu illup qalia kingusinnerpaamik ukiut qulit qaangiunneranni taarserneqartariaqartoq tamatumunngalu aningaasartuutissat 700.000 kr.-it sinnerlugit amerlassuseqartussat naatsorsuutigineqarsinnaasut pisinermini ilisimasimangikkuniuk attartortoq nuanninngitsumik pakasarneqarsinnaavoq. Paasisstissaaq taamaattoq illup pisiarinissaanik aalajanginnginnermi attartortut amerlanerit aningaasaateqarfimminnut oqaloqatiginnissutigerusussagaat ilimanarpoq. Taamaattumillu pisortat inissiaataasa attartortittakkat ilaasa aserfallatsaaliineqarsimangissusiat pisortallu tuniniaanerminni *paasisstissiissutigissallugit pisussaaffigisaannik annikillitsineq eqqarsaatigalugit piserusussinnaasunut mianersoqquteqassalluni tunngavissaqarsinnaavoq.*

Ataatsimiititaliami ikinnerussuteqartup Inuit Ataqtigiinneersup tunisinermit paasisstissiinermullu tunngatillugu immikkut maluginiaquaa: Tunisinermit inatsisiliornermi teknikkikkut illup qanoq issusaanik nalunaarut pinngitsoorani ilaatinneqartarnissaa piumasaqaataassasoq, taamaalilluni tunisinermi pisisoq illuutip qanoq issusaanik nalunaarut pillugu ilumoortumik, naapertuilluartumik piviusumillu paasisstissanik pisinnaaqullugu, tassanilu inissiami amigaataasinnaasut siunissami nutarterinissami aserfallatsaaliinissamilu suliassat missingiusiorneqarnera ilanngullugu. Tamatumani pisisup pisinerup nalaani ilisimaneqanngitsunik tassangaannaq naatsorsuutiginngisamik annertuunik akisuunillu nutarterinnginnissaa siunertarinqarpoq.

Illumittaaq pisisumut pisinermi isumannaallisaaneq ilanngunneqassaaq, Namminersornerullutik Oqartussat kommuniluunniit illup ingutserneqarnissaanut aalajangertoqassagaluarpat, ajornerusumik inissisimasoaqqunagu.

Kiisalu attartortunut Inatsisartut peqqussutissaata nutaap atuutilereernerani ininik attartukkaminik tiguisusunut taarsigassarsinermi atugassarititaasut pitsanngoriarnerat peqqussutissat siunnersuutip kingunerissavaa. Attartortut Inatsisartut peqqussutaat *atuuttoq* naapertorlugu inissiamik attartukkaminik tiguisimasut tunisinermi akiusup 40 %-ia pisortanit taarsigassarsiarisinnaasimavaat; - taarsigassarsiat ukiuni 15-ini ernialersugaanatillu akilersugassaangitsut, tamatumalu kingorna ukiut qulit ingerlaneranni taarsersorneqartussat. Aammattaaq attartortut Inatsisartut peqqussutaat nutaap atuutilernerata *kingorna* inissianik attartukkaminik tiguisut tunisinermit akiusup 40 %-ianik pisortanit taarsigassarsisinnaassapput. Taarsigassarsinerli tamanna *ukiuni 20-ni* ernialersugaananilu akilersugassaangilaq, tamatumalu kingorna *ukiuni 15-ini* taarsersorneqassalluni.

2. Ataatsimiititaliap inassuteqaataa

Siuliani allassimasunik oqaaseqaateqarlutik **ataatsimiititaliami amerlanerussuteqartut Siumumeersut, Atassummeersut Demokraatineersullu siunnersuut akuerisassanngorlugu inassutigaat.**

Ikinnerussuteqarluni oqaaseqaatimini allassimasut oqaaseqaatigalugit
ataatsimiititaliami ikinnerussuteqartup Inuit Ataqatigiinneersup siunnersuut
itigartitsissutigineqassasoq inassutigaa.

Taama oqaaseqarluni Inatsisartut Attaveqaqatigiinnermut Ineqarnermullu
Ataatsimiititaliaata peqqussutissatut siunnersuut aappassaaniigassanngortippaa.

Jürgen Weyer Johansen,
Siulittaasup tullia

Emilie Olsen

Esmar Bergstrøm

Marie Fleischer

Ole Thorleifsen